

S.D.S.M.

Procez burlesque

SITY OF N.C. AT CHAPEL HILL



0023007210

**RARE BOOK
COLLECTION**



**THE LIBRARY OF THE
UNIVERSITY OF
NORTH CAROLINA
AT
CHAPEL HILL**

Mazarin
2884

PROCEZ

BVRLESQVE

ENTRE

MR LE PRINCE


ET MADAME

LA DVCHESSE

D'ESGVILLON,

AVEC LES PLAIDOYERS.

Par le S. D. S. M.



A PARIS,

Chez la Veufve THEOD. PEPINGVE', & Est.

MAVCROY, ruë de la Harpe vis à vis
la ruë des Mathurins.

M. DC. XLIX.

Avec Permission.

PROCES

BARLESQVE

ENTRE

MR LE PRINCE


ET MADAME

LA DUCHESSE

D'ESGAILLON

AVEC LES PLAIDOYERS.

Par le S. D. S. M.



A PARIS,

Chez la Veuve THEOD. PERINCEY, & Fils
MAYOROT, rue de la Harpe vis à vis
la rue des Mathurins.

M. DC. XLIX.

Année Troisième.

PROCEZ BVRLESQVE

ENTRE

MR LE PRINCE

ET MADAME

LA DVCHESSE

D'ESGVILLON.

PAVL fils de Paul, ce bon Apostre,
A toy donc plus qu'à pas vn autre,
Je veux par inclination
Donner vne relation,

Qui sera bonne ou bien mauuaise,

Si bonne elle est, j'en suis bien aise,

Si mauuaise au contraire elle est,

Il ne m'en plaist ne m'en desplaist:

Mais qu'elle soit mauuaise ou bonne,

Telle qu'elle est ie te la donne.

Elle contient ce qui passé,

Fut au Palais le mois passé,

Que May depuis long-temps on nomme

Aussi bien icy comme à Romme

(Non pas en ce Palais Royal

Qui fut autrefois Cardinal)

944.03

M475m

No. 2884

Mais dans le Palais, où Iustice
 A ceux qui droict ont est propice,
 Et qui condamne rudement
 Ceux qui litigent follement.

Or comme tu fais sentinelle
 Chez toy dedans chaize eternelle,
 Et qu'ainsi ie n'ay le bon-heur,
 (Vn courtisan droit l'honneur)
 D'estre admis dans ta connoissance,
 Dont i'ay moult grande déplaisance:
 Ce nouueau sujet i'ay trouué,
 (Apres auoir beaucoup resué)
 Pour pouuoir visite te rendre,
 Et par ce mien escript t'apprendre,
 Ce que ne t'a permis ton mal
 De voir en son original;
 Car la foule dedans ta biere
 T'eust reduit en grande misere:
 Rondement donc ie descriray,
 Et point ou peu ne mesdiray.

Desia t'auoir dit quelque chose,
 Quelqu'un aura pû de la cause
 Du testament riche, & fameux,
 Où ne mit aucuns legs pieux,
 Celuy qui n'aguere en ce monde,
 Commanda terre, & brida l'onde,
 Faisant regner en cet Estat
 Son souuerain Cardinalat:
 Aussi croy que ne l'aimoient mie
 Beaucoup de Gents de l'Italie,
 Non plus que le peuple Lorrain,
 A cause de son Souuerain,
 Que cet Armand espouuantable
 A mis en estat deplorable;
 L'ayant hors de Nancy ietté,
 Et s'il l'eust pris, l'eust etesté:

Il fit piece pourtant bien sotte
 Alors qu'il luy rendit la Mothe;
 Car depuis ce temps Champenois
 Gaulez ont esté comme nois;
 Cliquot remportant maint bagage
 Que sur eux il prend par pillage:
 Maintes gents aussi dans Paris
 (Si ce n'estoient ses fauoris)
 Parloient mal de cette Eminence,
 Sans espargner sa continence;
 Mais soudain les vns exiloit
 Autres à son ire immoloit.
 Tu sçais s'il se monstra seuer,
 Quand Paul l'aisné, ton deffunt pere
 Desquilla du trosne des Lois,
 Et fit planter choux près de Blois;
 (S'il deuoit reuenir en vie,
 D'en parler n'en aurois enuie,
 Ny d'en dire ny bien ny mal;
 Crainte que comme vn Marechal
 Voir ne me fist fessez de ville,
 Au trauers d'une verte grille)
 Mais adonc puis qu'estant passé
 Plus ne reuient vn trespasé;
 Il me permettra de te dire,
 Cé que feras aise de lire;
 Car point tu n'as de fondement
 D'en auoir mescontentement.

Donc d'Auril le vingt-huictiesme,
 Ou plus vieux l'antipenultieme,
 Ou trois iours parauant le mois
 Que Rossignolet chante au bois,
 Dans la Salle ie veids Duchesse
 Ouir fort deuotement Messe;
 Tenant en sa main Chapelét:
 Autrefois le sieur Combalet.

Eust l'honneur de l'auoir pour femme;
 Mais quand la mort deffous la lame
 Eust reduit ce pauvre Monsieur,
 Cousin de l'ancienne faueur,
 De cil, si trouuer rime en ourpre
 Pouuois, ie dirois que le pourpre,
 Deuant Montauban emporta,
 Dont beaucoup on ne s'attrista.

Cette Dame le voyant vesue
 Sentit vne douleur griesue;
 Et quoy que sa grande beauté,
 Iointe avec sa pudicité,
 Donnast de l'amour à grands Princes,
 (Comme à Gouverneurs de Prouinces)
 Voulut viure en viduité,
 Voüant à Dieu virginité;
 D'où vient qu'elle a fait mettre en bosse,
 Au derriere de son carosse,
 Avec admirable fasson
 D'vne pucelle l'escusson:
 Aussi sa deffunte Eminence,
 Luy porta telle bien-veillance,
 Que peu d'amour luy ressembloit;
 Car tous les iours il redoubloit.

Cette prudente & sage Dame
 Peu de soin pas n'auoit dans l'ame;
 Et quoy que sa deuotion
 Auoir luy fist attention,
 A ce saint & sacré mystere
 Que celebroit vn fort bon Pere:
 Quand voyoit quelque Conseiller
 Vers la grande Chambre driller,
 (l'entends ceux-là de qui les testes
 Sont blanches sortans des Enquestes,
 Cathedrez sur les fleurs de Lys,
 Où nos Monarques sont assis)

Lors se leuoit en diligence ;
 Pour luy faire la reuerence ,
 Et recommander le bon droit,
 D'important procez qu'elle auoit,
 Touchant la volonté derniere,
 De l'empourpré Frere à sa Mere:
 Et quand President paroissoit,
 Humblement elle s'abaissoit,
 Rendant fort grande defference,
 A souueraine Presidence,
 Troupe fort belle la suiuoit,
 Qui la mine tres-bonne auoit,
 Gentils-hommes, ou Damoiselles,
 Ou bien femmes, ou bien pucelles;
 Pucelles pourtant que ie croy,
 Et si tu demande pourquoy?
 C'est que cette Dame estant fille
 N'en voudroit d'autre en sa famille;
 Cette troupe n'auoit bon teint;
 Mais c'est que trop matin l'on vint,
 (Telles Dames ayant coustume,
 Se leuer tard crainte du rume)
 Mais laissons la complimenter,
 Et ses raisons representer,
 Pendant que puissant Prince arriues
 (Ie croy que sans que le descriue
 Trop bien sçauiez desia quic'est ;
 Mais comme ie croy qu'il te plaist,
 Rendre il te faut obeïssance)
 C'est le premier Prince de France,
 Chef de la Maison de Bourbon,
 Sage, vaillant, sçauant, & bon ;
 Où si tu veux que ie m'explique,
 C'est de Condé Prince heroïque,
 Il conduisoit à son costé
 Vne ieune & tendre beauté,

C'estoit Madame la Duchesse,
 Que Mariage a fait Princeſſe,
 Niepce du deffunct Cardinal,
 Et fille du grand Mareſchal
 De Brezé, famille ancienne,
 Plus noble que tienne ny mienne;
 Car de l'ancien ſang de Maillé,
 Touſiours bouillant iamaïs caillé,
 Ce puiffant Officier de France,
 Fiſt naiſtre Madame Clemence:
 Auſſi le deffunct euſt l'honneur
 De luy auoir baillé ſa ſœur.

Or auoit vne belle ſuite
 De Filles de tres-grand merite
 Entr'autres, la belle Stroſſy,
 Que ie connois & nomme auſſi,
 Fille de Dame bonne & ſage,
 Qui maintenant eſt en veuſſage,
 Si les autres ie connoiſſois,
 Volontiers vous les nommerois;
 Mais puis que n'en ay cognoiſſance,
 Je les paſſeray ſous ſilence;
 Ils entrerent par le Parquet,
 Quand leué on eut le loquet,
 Et qu'Huiſſiers, avec leurs baguettes,
 (Que maint, & maint hommes bonnettes)
 Fait retirer eurent les gents:
 Alors ils entrerent leués,
 Et de là dedans la grand Chambre,
 Où plus chaud faiſoit qu'en Decembre.

Pour vous dire ce qu'on y fit,
 Perſonne ne me la point dit,
 Et ſi n'eſtois là ie vous iure
 Pour vous en faire la figure
 Trop bien ſçay, qu'apres qu'en chambre
 Furent pourprez, & non pourprez,

D'Esguillon la noble Duchesse,
 Soit qu'elle apprehenda la presse,
 Soit qu'elle n'eust assez dormy,
 Hors Palais en aller ie vy ;
 Dont i'eust tres grande desplaisance,
 La voir croyant à l'audiance,
 Pouvoir soustenir le bon droit,
 Qu'aux Iuges a dit qu'elle auoit
 Seulement cette bonne Dame,
 (Que plus que deuot zele enflame)
 Aumosnier à elle y laissa,
 En qui grande fiance elle a ;
 Aussi là si fut demeurée,
 Cette grandeur tant admirée,
 Qu'autresfois dans l'estat elle eust,
 Par trop soumise elle se fust.

Lors afin de retenir place,
 I'abandonnay la populace,
 Et sans m'engager au caquet,
 Je trauersé par le parquet ;
 Non pas celuy de l'Huissierie,
 Qui conduit à la plaidoirie,
 Ains par celuy des Gens du Roy,
 Sçauans en matiere de Loy,
 Prenans en main cause publique,
 Dans Palatine Republique,
 (Messieurs appeller on les doit,
 Mais le vers par trop long seroit,
 Si bien que si ie fais vn crime,
 Il faut pardonner à la rime.)

Par là ie coulay doucement,
 Sans marcher par trop brusquement,
 Et puis i'enfilay la montée,
 Qui n'est gueres souuent frotée,
 (C'est le degré par où piffer
 Viennent Messieurs.) Là pour passer,

Il me fallut liurer bataille
 Contre honnestes gens & canaille
 Car Conseillers & Aduocats,
 Procureurs, petits Magistrats,
 Clercs, & solciteurs à gage,
 Occupoient ce puant passage.
 Nous n'estions pas pourtant trop mal,
 Pour entrer au moindre signal.
 Ce que fîmes, mais en grand foule,
 Conseiller, sur le Clec, se roule,
 Le Procureur, sur l'Aduocat;
 Vn chacun pour place se bat,
 Et pour plus aisément entendre,
 Ce qu'on occupe, on veut defendre.
 Mais ie voy Messieurs arriuer,
 Sans qu'on s'empesche d'escriuer.
 Desia premier President monte,
 Et de faire bruit n'auons honte.
 Apres luy suit Monsieur Potier,
 Digne President au Mortier,
 De Nouion l'on le surnomme,
 Et dit on que c'est vn preud'homme.
 Monsieur de Mesmes vient apres,
 Lequel ne passe pour niais,
 De deffunct Roissi fils tres-digne,
 En sçauoir grandement insigne,
 Dont le frere est dedans Munster,
 Pour trefue ou paix nous apporter.
 De l'Espagne avecque la France,
 Dequoy la deffunte Eminence,
 Eust pû deuenir enragé,
 Si la mort ne l'eust vendangé.
 Et par triomphante voiture,
 Conduit dedans la sepulture.
 Apres, suiuent les Senateurs,
 De la Iustice protecteurs.

Lais, & non lais, vieilles personnes,
 Ayans consciences fort bonnes;
 Estans montez; l'Huissier premier,
 Ou si voulez, Premier Huissier,
 Avecqu' vn maintien fort honneste,
 Vn beau bonnet ayant en teste,
 Tout couuert de toille d'argent,
 Meilleur que celuy d'un Regent;
 Vn tour ayant de perles fines,
 Et le dedans fourré d'hermines,
 Il dit que l'on ne fasse bruit;
 Et cela ne fut pas sans fruit;
 Puis qu'aussi tost murmure cesse,
 Et la rumeur enfin s'abaisse:
 Luy se leue, ostant son bonnet,
 Plus doux que casque à Lansquenet,
 Et crie, d'une voix tremblante,
 Oouvrez, (& l'on diroit qu'il chante.)
 Aussi tost vn Huissier accourt;
 Il ouvre, & tout le monde court,
 Vers les Barreaux, pour prendre place,
 L'un dedans, l'autre s'embarasse,
 L'un dit, qu'on luy rompt le costé;
 L'autre, qu'il est acrauanté.
 Apres qu'on eut dit qu'on se baïsse,
 Alors le Prince & la Princeesse,
 Vis audience demander,
 Pour faire leur cause plaider;
 Ce que refuser on n'eust garde;
 Aussi premier Huissier ne tarde,
 Cette grande cause appeller;
 Et se plaist bien d'articuler,
 D'une voix presque musicale
 (Dont retentit toute la Salle)
 Il se rompt presque le gosier,
 Nommant le Procureur Mazier,

Bourdon, pareillement il nomme;
 Qui passe pour tres-honneste homme,
 Et eust pour insigne bon-heur,
 D'estre du Prince Procureur;
 Le Mazier est pour la Duchesse,
 Qui jadis fut plus que Princeesse;
 Bourdon appelle l'Aduocat
 Gaultier, à qui faut maint ducât,
 Pour faire plaider vne cause;
 Car peu d'argent ne l'y dispose;
 Aussi beaucoup cét homme vaut,
 A les Cliens qui point ne fault;
 Et s'il prend avec allegresse,
 Il les deffend avec adresse;
 D'où vient que Monsieur de Condé,
 De le prendre n'a point tardé.

Le Mazier d'appeller Hilaire,
 S'esgosille, & se desespere:
 Aduocat grandement sçauant,
 Grandes causes plaide souuent,
 Tres-excellent Iuriscōsulte,
 Et que force monde consulte;
 Que Dame au petit Luxembourg,
 Chez la Reyne ayant le tabour,
 A choisi pour son droict deffendre,
 Et le faire aux Iuges entendre.

Quand la presse ils eurent fendu,
 Et respect à la Cour rendu,
 Gaultier son plaidoyer commence,
 D'esprit avec grande presence,
 Dit que renonciation,
 Qu'a fait à la succession,
 Par son contract de mariage,
 La Princeesse n'estant en aage,
 Est nulle; aussi que promptement,
 Auoit protesté hautement;

Contre

Contre la grande violence
 Qu'elle souffrit de l'Eminence
 (Elle n'y pouuant resister,
 Ny l'ozant sur rien contester)

Qu'au testament, ou codicille,
 Quoy que le deffunct fut habille,
 Nullitez sont au nombre sept,
 Que par ordre en sa cause il met.
 Et commençant par la premiere,
 Point d'heritier, point d'heritiere,
 (Comme requiert le droit escrit,
 Que dans Narbonnel'on prescrit.)

Et pour la nullité seconde,
 Sur laquelle Gaultier se fonde,
 C'est que tesmoins, n'ont cachetté
 Testament par eux attesté.

En suite il dit pour la troisieme,
 Si que pour le tesmoin huitiesme,
 Falconis le Tabellion
 Aposer n'auoit pû son nom,
 (Fonction faisant de Notaire,
 En cet acte plein de mystere.)

La quatrieme nullité,
 Est (si ie n'ay mal escouté,
 Et si i'ay memoire aussi bonne,
 Que ie l'auois deuant l'Automne)
 Que cet acte, *uno contextu*
 Avoir esté parfait, n'a pû.

Pour ce qui est de la cinquiesme,
 Ou bien de l'antipenultieme;
 C'est que n'estans point appelez,
 Tous les tesmoins y sont allez.

La sixiesme, que ie pense,
 Est, que sa deffunte Eminence,
 Fist signer indifferemment,
 Domestiques au testament.

Et pour la nullité dernière,
 Visible comme la première:
 Point n'est d'interpellation,
 De mettre sa souscription
 (Ainsi que le veut l'ordonnance)
 Dont nous faisons grande obseruance,
 Celle d'Orleans, & de Blois,
 Qui nous sont prescrites pour Loix.

Après il dit que la Duchesse
 Estoit bien pleine de finesse,
 Qu'elle auoit par suggestion,
 Fait vne forte impression,
 Dans cette puissante ceruelle,
 Soumis l'ayant à sa tutelle,
 La comparant à Dalila,
 Qui de Samson cœur affola.

Mais l'heure coupa sa parole;
 (Dont il faut que l'on se console;
 Puis que l'heure sonnante, hélas!
 De plus parler permis n'est pas)
 Ce qui fist que Cour souveraine,
 La cause remit à huitaine;
 C'est pourquoy le cinquiesme May,
 Au Palais retournay tout gay,
 Afin d'estre instruit de la suite
 De l'histoire que ie recite.

As sceu desia par cy-deuant,
 (Et tu dois en estre sçauant)
 L'estat auquel estoit la Dame,
 Depuis que Iustice reclame,
 (C'est à dire attendant Messieurs,
 Et leur rendant de grands honneurs)
 Dequoy ne prenoit pas la peine,
 Lors que regnoit faueur haotaine;
 Car vn des siens, au Parlement,
 Enuoyoit souverainement.

Je fus comme la fois premiere,
(Ainsi que ie t'ay dit naguere.)
Pour me placer commodement,
Huissiers caressant souplement.

I'entray donc sans beaucoup de peine,
Comme ie fis l'autre semaine,
Et dans le parquet me placé,
Où pas vn peu ne me lassé :

Car à mon aise n'estois guere,
A terre assis en grand misere,
Genouïls miens ne se dilatans,
Ny gigots, estendus estans;
Si que i'eus grande lassitude
Pour du monde la multitude.

Quand Messieurs furent arangez,
Et que barreaux furent chargez,
Après ouuerture de porte,
Alors, Gaultier, d'yne voix forte,
Reprenant son huictain discours,
Conclud apres quelques destours,
Contre la volonté derniere;
A ce qu'Arrest, iuste, & seuer,
Cassast renonciation,
Suiuant la protestation :

Au temps faite de mariage,
Que Princesse n'estoit en aage.

Aussi despens il demanda,
Finissant sa cause par là,
Qu'il appartenoit à Iustice,
Et qu'il estoit de son office,
D'empelcher que tous ces thresors,
Qui sont dans la France, & dehors,
A la Combalet appartiennent,
Et que les Vignerots les prennent;
Mais il faut avec raison,
Que ceux de Royale Maison,

Illustres dedans leur naissance,
 Et presque de diuine essence,
 Tel qu'est Monsieur le Duc d'Enguien,
 Prennent bonne part dans ce bien;
 Ainsi que dans son origine,
 Et dedans sa source pristinne,
 Ce grand auoir retournera,
 Et que public content sera,

Quand à moy i'oserois bien dire,
 Maintenant qu'un peu ie respire,
 Que Gaultier, raison bonne auoit.
 On sçait que celuy qui mouuoit,
 A son desir, toute la France,
 N'a pas gagné tant de cheuance,
 Par le grand trauail de son corps.
 Ains, qu'il a ioué tous ressors,
 Sans donner repos à son ame.
 Et sans se soucier de blasme,
 Pour amasser biens, & honneurs,
 Pour deposseder gouverneurs,
 Et pour mettre dans sa Famille,
 Plus d'or que n'en a la Castille:
 Illustres chefs faisant couper,
 Pour leurs dignitez vsurper,

Mais trop ie fais le Politique,
 Et ie sors de mon ecliptique,
 Pour sur le passé raisonner,
 Dequoy l'on me pourroit berner.

Voyons plustost le graue Hilaire,
 Manifester sa mine austere,
 Et commencer sa cause ainsi:
 Puis qu'on nous a conduits icy;
 D'Eguillon la Dame Duchesse,
 Deuant vous tous, Messieurs, confesse,
 Que perdre l'on ne la veut pas;
 Car ce seroit estrange cas,

Que

Que dedans la grande puissance,
 Que Monsieur le Prince a en France,
 (Estant premier Prince du sang,
 Y tenant le troisieme rang)
 S'il vouloit contr'elle entreprendre,
 Tous les grands biens il pourroit prendre:
 Citant Ioseph l'historien,
 Et le passage Herodien;
 (Lors que deuant le grand Auguste,
 Herodes des Iuifs Prince iniuste,
 Ses deux enfans fit amener,
 Pour les y faire condamner.)

Puis refutant d'ardeur extrême,
 Et faisant passer pour problème,
 Ce que l'on auoit opposé,
 Dit que l'on auoit abusé
 De Souueraine patience,
 Lors de la derniere audience.

Il parla fort elegamment,
 Citant aussi pertinemment,
 Tres à propos à sa matiere,
 Du testament la Loy derniere,
 La Loy *Hac consultissima*,
 Que grand Iustinian forma,
 Pour apporter regle certaine
 A volonté derniere humaine:
 Aussi scauant Tribunian,
 Ne ceddant à Popinian,
 La fit inserer dans le Code,
 Afin de seruir de methode,
 Pour bien composer testament;
 Et certes il fit sagement.
 Aussi cita forces passages
 Beaux & bons comme des Adages,
 La Loy *Lucius Titius*,
 Avec la Loy *Domitius*;

Par où soustenoit, que Notaire
 Telsmoin peut-estre en ce mystere,
 Et que la protestation
 Contre renonciation,
 Auoir point ne pouuoit de force,
 Quoy que de le dire on s'efforce.

Après quelques lettres il leut,
 Dequoy fort bien passé se fut,
 Et de dire quelqu'autre chose
 Que repeter certes ie n'ose:
 Et ie m'estonne fort comment
 Il parla tant ouuertement,
 Car quand à moy, ie vous assure
 Que dans vne telle aduanture,
 Je m'en fusse fort bien gardé,
 Crainte d'estre bastonnadé,
 Et faire rude penitence,
 D'un discours de telle importance.

Mais comme l'horloge sonna,
 Chacun chez soy s'en retourna,
 En attendant à la huitaine,
 Qu'on se donna bien de la peine
 Pour ne rien entendre du tout,
 Hilaire n'estant point debout,
 Ains en son liét gisant malade,
 Où peut-estre estant à l'estrade;
 Car pris auoit médicament,
 Et mesme quelque lauement,
 Qui l'empescha faire sortie,
 Et de plaider pour sa partie:
 Si qu'au vingt-trois on remit,
 Dequoy fasché le monde on veid.

Donc arriuant cette journée
 A ce plaidoyer destinée,
 Chacun y vinst de grand matin,
 Pour ne point prendre peine en vain.

Apres qu'on eust fait ouuerture,
 Et que cessé fut le murmure,
 L'Aduocat recapitula,
 Et iusqu'à dix heures parla
 Avec ardeur, de la prudence,
 Ensemble de l'expérience,
 Du Cardinal de Richelieu,
 Descendu de tres-noble lieu;
 Car dit-on, de race Royale,
 Fut cette Eminence Ducalle,
 Du costé de Louys le Gros,
 Dont à saint Denys sont les os.
 (Ce qui n'est vray, la flatterie
 Ayant fait cette menterie.)
 Aussi, dit-il, qu'absolument
 Auoit pû faire testament,
 Sans qu'il encourut de censure,
 Ny qu'on y trouuast d'ouuerture,
 Pour disputer à ses parens
 Ses biens, quoy que trop apparens.

Le lendemain vingt quattiesme,
 Il parla presque tout de mesme,
 Et dit pour sa conclusion,
 Que lettres de rescision
 Ne peuuent pas estre valables,
 Que demandeurs non receuables,
 Estans à l'entherinement;
 Il conclud au déboutement.

Apres quoy le ventru Rozée,
 Avec sa voix organisée,
 Et joliment emperruqué,
 Qui le sur-tault a pratiqué,
 (Depuis multitudes d'années,
 Soit pour parroisses abonnées,
 Ou celuy qui trop rudement
 Taxé, requiert soulagement,

Ou bien pour Afféeur destailles,
 Collecteurs, & telles canailles ;
 En cette souveraine Cour,
 Des procez d'Aydes le sejour.

Ce bon homme dans cette cause,
 Parla tousiours fort bien en Prose,
 Pour Monsieur du Pont de Courlé,
 Du deffunct. Nepueu signalé,
 Fameux General des Galaires,
 Quoy que sur Mer il ne fut guerés ;
 Car des Mers le Surintendant,
 Craignoit pour luy quelque accident.

Il se plaignit, qu'une Memoire,
 Qui doit estre auant dans l'Histoire ;
 Que le nom du feu Cardinal,
 Qui fit tout à bien, rien à mal,
 Taxé soit en sa renommée,
 Qu'on a hautement diffamée ;
Immo vero, a demandé,
Primo, qu'il luy fust accordé,
 Que du Roolle de medifance,
 La Cour rayast son Eminence.

Secundo, que ce testament,
 Fait avec grand Iugement,
 Demeurast dans sa subsistance ;
 Remonstrant avec l'éloquence,
 (Dont ordinairement se sert
 Cét homme en taille fort expert,)
 Que Marquis du Pont sa partie,
 Estoit si plein de modestie,
 Que quoy qu'il fust des-herité,
 Il ne s'estoit point irrité ;
 Et tant reueroit la Memoire,
 De son Oncle remply de gloire,
 que pas ne vouloit contester,
 Mais bien plutost executer

Du deffun& volonté dernière,
 A quoy librement obtempere;
 Comme doit faire son nepueu,
 Ayant l'ame assize en haut lieu.

Puis cita forces beaux passages,
 Dont fit merueilleux assemblages:
 D'Autheurs cogneus & non cogneus,
 Et pour rares hommes tenus;
 Dont au Palais bien ancienne,
 Iamais ne parla langue sienne,
 Dequoy le monde estonné fut;
 Car sans l'ouyr, creul'on ne l'eust:
 Mais son espoisse corpulence,
 Auecque plus de reuerence,
 Deuoit son discours prononcer,
 Sans Monsieur le Prince offenser.

Après qu'il eut conclud, Bataille
 (qui ne plaide plus pour la Taille,
 Ainsi que jadis il faisoit,
 Pour ceux que trop on cortisoit,
 Parauant que son éloquence
 Le fist Aduocat d'importance,)
 Parla pour le Duc de Bresé,
 qui ne doit estre mesprisé;
 Car de Dame d'Anguien est Frere,
 De Pere, aussi bien que de Mere;
 De la France Grand Admiral,
 Vaillant, courtois, & liberal:
 Il dit, quoy que la Cour pourprine
 De ce testament determine,
 Son Client n'a point d'interest,
 De quelle façon soit l'Arrest;
 Ainsi qu'à la Cour se rapporte,
 Et de contester se déporte.

Pour la Sorbonne, Montelon
 Fit son plaidoyer par trop long,

Gaultier consentant deliurance,
 De son Legat par preference.
 Pucelle pour la Mission,
 Eut mesme composition.
 Tant d'Aduocats cette iournée;
 Ayans la cause fredonnée;
 Mais Gaultier repliquer voulut,
 Dont licence aisément il eut.
 Lors il commença sa repliche,
 Par ce qu'on veoid dans la chronique,
 Qu'homme de grande qualité,
 Ayant eu la temerité;
 De parler avecqu' insolence
 A Prince de haute naissance,
 Il fut par son gosier pendu,
 Demeurant en l'air morfondu.
 Celuy-là iouïoit de la gripe,
 Lors que regnoit le beau Philippe:
 Mais il fut assez impudent
 Encore que Sur-Intendant,
 Et de Longueville fut Comte,
 Quand ce Prince demanda compte,
 De luy donner vn desmeny,
 Dont tost suivit le repenty:
 L'histoire Marigny le nomme,
 Qu'elle dit n'estre Gentilhomme.
 Qu'autre pour le mesme sujet,
 Quoy que venu de pere abject,
 Eust les deux oreilles coupées,
 Et les espaules fustigées,
 Ce que dans Montferrand l'on vid,
 Où naissance ce galand prit.
 Il gouverna Louys vnzième,
 Et souffrit sous Charles huietiesme:
 Doyac cet homme se nommoit,
 Que Louys cherement aymoit.

Je confesse que j'eus croyance
 qu'on conclueroit à l'audiance,
 A ce qu'Hilaire on estranglast,
 De verges Rozée on sanglast,
 Et qu'ainsi l'Aduocasserie
 S'en allast par la penderie,
 Et les plus hupez du barreau,
 Deuinssent gibier du bourreau:
 Il est vray que dedans leurs causes,
 Ils auoient dit d'estranges choses,
 Dequoy le Prince de Condé,
 Eust fort bien raison demandé;
 Mais non pas à ce que ie pense,
 Pour les attacher à potence,
 Non plus que les efforiller,
 Ny de verges les estriller.
 Aussi vis ie en grande colere,
 Hilaire ne se pouuant taire,
 Disant que memoires auoit,
 Sur lesquels plaider il pouuoit.

Assez long-temps dura la noise;
 Mais premier President l'accoise,
 Disant, qu'ils plaidassent leurs faits,
 Et qu'ils remissent leurs bonnets.
 Ainsi s'assoupit leur querelle,
 (Et Gaultier parlant avec zele)
 La violence exagera,
 Et le pouuoir rememora,
 Dont abusoit durant sa vie,
 Ce grand angouleur d'Abaye:
 Mais par trop parler, soit il eut,
 Parquoy fit pose, & puis il beut,
 Ou vin, ou bien eauë, ne m'importe,
 Tant est qu'il eut la voix plus forte.

Aussi parla il d'action,
 Soustenant que l'extraction

Des Vignerots n'auoit noblesse,
 Pour tant porter cette Duchesse,
 Qu'elle venoit d'un Chastelain,
 Qui ne fut autre que vilain,
 (L'entends d'un luge de village)
 Qui valoit bien moins qu'un Bailliage;
 Aussi Curé son oncle estoit,
 Ainsi que l'Aduocat cottoit,
 Du village de Bressuire,
 (Ce que l'on ne peut contredire)
 Village scis dans le Poictou,
 Où iamais n'allay peu ny prou;
 De sorte que n'estoit de race,
 Qui put meriter cette grace,
 (Le tout estant bien recherché)
 De posseder vne Duché,
 Qui porre titre de Pairie,
 En France grande Seigneurie,
 Car ayant cette qualité,
 L'on peut estre manifesté,
 Sur Fleurs de Lys Parlemantaires,
 Au dessus de tous ces bons Peres,
 Rendans iugemens souverains,
 Avec leurs habits purpurains;
 Ce qui ne conuient à Pucelle,
 Qui mesme n'est pas Damoiselle;
 Pourquoi le Prince de Condé,
 Scachant comme on a procedé,
 Dans le Chastelet à la vente,
 D'une terre tant apparente,
 Appel auoit interjetté
 De ce decret precipité:
 Aussi Madame la Duchesse,
 Ne doit point estre la maistresse,
 De ce beau Duché d'Aiguillon,
 Les siens payans taille & taillon.

De moy pour mon sentiment dire,
 Non que ie pretende mesdire,
 Mais tant seulement raisonner
 Sans point ne me passionner,
 Quand Lieutenance Magistrale,
 Et Iustice Presidiale,
 De gens tenans le Chastelet
 (Non trop loin de la pierre au laict)
 Eurent d'adjudger la puissance,
 Ce Duché dans leur Audiance;
 Ils deuoient bien se souuenir,
 Que toute grace il faut bannir,
 Alors que l'on rend la Iustice:
 Qu'il ne faut suiure le caprice
 Des puissans , ny de la faueur,
 Et que tout homme ayant grand cœur,
 Au pauvre , aussi bien comme au riche
 D'equité ne doit estre chiche:
 Que si Monsieur le Lieutenant,
 En ce temps le Siege tenant,
 Eust bien considéré l'affaire,
 De tous il eust receu l'enchere.
 Et sans precipitation,
 Eust fait l'adjudication;
 Par ainsi , toutes les personnes
 Dont les debtes estoient fort bonnes,
 Eussent receu contentement,
 De leur deub, ayant payement:
 Mais l'autorité Cardinale
 Força pour lors la Magistrale,
 Chacun aussi sçait bien comment,
 Falloit obeïr promptement:
 Quand Gaultier eut fait sa replique,
 Qui n'estoit mal satyrique,
 Interuinist l'Aduocat Huot,
 Qui dans le Palais n'est point sot.

Natif il est de Bray sur Seine,
 De Nogent ville assez prochaine.
 Iadis plaïda pour Medecins,
 Qui rendent les malades sains,
 Contre l'Intendant de Gazette,
 Qui de nez a grande difette.
 Pour vn homme il interuenoit,
 Et le testament soustenoit,
 L'auoir nommé pour legataire,
 Et que la volonté dernière,
 De gages luy laissoit six ans,
 Pour auoir aux nobles enfans,
 Qui du Cardinal estoient pages,
 Sortis de releuez lignages,
 Les Mathematiques monstre,
 Ainsi qu'il estoit registré
 Au nombre de ses domestiques,
 Comme Maistre à Mathematiques.

Mais Hilaire dit hautement
 que c'estoit impertinemment,
 que cet homme Maistre de dance,
 De legs demandoit deliurance,
 N'estant point couché sur l'Estat,
 De cet Eminent Potentat.

Cette interuention finie,
 Dont on ne se soucia mie,
 Les deux Aduocats archboutans,
 L'un de l'autre pas trop contens,
 Se donnerent force estocades,
 Dont la pluspart estoient bien fades.
 (I'entens estocades du bec)
 Car, soit à cause du respect
 qu'à la Cour l'un & l'autre porte,
 Ou pour quelque cause plus forte,
 Garde n'eurent de se gourmer,
 Car sans qu'on eust fait informer.

Ces Messieurs de la Chambre grande;
 Leur eussent fait payer l'amende;
 Joint qu'ils n'estoient auoifinez;
 Pour se donner des casse nez:
 On lès fit toutesfois bien taire,
 Puis avec visage severe,
 Monsieur le premier President,
 Fut opinions demandant,
 Et quand sa place il eut reprise,
 Au lendemain fut la remise;
 Quoy qu'il restast beaucoup de temps,
 Dont faschez feurent maintes gens.

Lors premier Huissier de son roolle
 (Ne plus ne moins que d'une gaulle)
 Vn coup frapa sur son bureau;
 Puis en s'en allant bien & beau,
 Premier Huissier pourtant rechigne,
 Deçà, de là, guigne & reguigne,
 Dit qu'affaires point ne se font;
 Ny qu'escus en ses mains ne vont:
 Mais il a tort d'estre en colere,
 Puis que pour cette grande affaire,
 Il sera tant recompensé,
 Qu'il n'en sera plus courroucé.

Ainsi la foule desempare;
 Et de reuenir se prepare
 Au lendemain de bon matin,
 Pour veoir qu'elle en seroit la fin;
 Du Marais, de Place Royale,
 De tous quartiers, mesmes des Halles,
 Toutes sortes de nations,
 Et de toutes conditions,
 Se rangerent proche la porte,
 Composant puissante cohorte.

I'y remarquay des Courtisans,
 I'y veids mesme des Payfans;

S'y fourroient aussi des Chanoines,
 Des Prestres, avecque des Moynes,
 Moynes froquez, & non froquez,
 Dont les goustets n'estoient musquez,
 Enfin, tout le monde s'y range,
 Et l'on s'y presse plus qu'au Change,
 Pour ne perdre l'occasion
 D'entendre la conclusion.

Montmort guindé dessus sa beste,
 Partit pour venir à la Feste,
 Et quoy quel'on n'y disna point,
 I'y veids le moule à son pourpoint.

Auant que dernière iournée,
 Soit dans cét escrit terminée,
 Ne veux sous silence passer,
 Que noble Dame fit dresser
 De recusation Requeste,
 Vne ou plusieurs, ne m'en enqueste,
 Non pas mesme, en quel iour ce fut,
 Que dans grande Chambre on les leut:
 (A vous, à moy, cela n'importe)
 Quoy que ce soit, requeste auorte;
 Ainsi, ceux qui sont refusez,
 (Sinon qu'ils s'en soient excusez)
 N'ont laissé de demeurer Iuges,
 Nonobstant tous les subterfuges,
 De la Duchesse d'Aiguillon,
 Dont sur la iouë est vermillon.

Pour reuenir; ma destinée
 Me logea vers la cheminée.
 Apres que porte ouuerte on eust,
 Et que tout le monde entré feust,
 Moy conuié, & plusieurs autres
 Fusmes dessus les jambes nostres
 Tant que le Plaidoyer dura,
 Dont ma bouche ne murmura,

Me disposant à patience,
Et debout estre à l'audiance.

Silence fait, Monsieur Briquet,
L'un des Aduocats du parquet,
Pour le Roy portant la parolle,
Ne dit rien du tout de friuolle;
Car puissamment il raisonna,
Et tout le droit examina,
Que pouuoit auoir la Duchesse,
Par disposition expresse
De Monseigneur le Cardinal,
(Nom qu'il perdit au iour final)
qu'il laissa pour la sepulture,
Son corps remply de pourriture;
Car depuis cet heureux moment
A cessé ce haut compliment;
Et Monsieur, à peine on le nomme
Estant mort ainsi qu'un autre homme.

De ces nullitez il parla,
que Gautier sept articula,
Pour ce grand testament destruire,
Où ne trouua guere à redire,
Puis la louange a estallé,
Et tous les beaux faits enfilé,
De celuy-là, qui la Sorbonne,
De vieille la fait belle & bonne;
Beaux faits desquels il se seruit
Et par où tant d'or il raut
Sous ombre d'enuahir l'Espagne,
Desolant toute la campagne
Par imposts & tributs nouveaux,
Faisant passer François pour veaux.
Il reuinist à Monsieur le Prince,
Seigneur qui n'est point du tout mince,
Puis le Duc d'Anguien louangea,
Sans que point du tout mensongea,

Mesme blasma son Eminence,
 De ce qu'il eut bien l'arrogance
 Se servir d'un Prince si grand,
 qui du Roy Saint Louys descend,
 Pour estançonner sa famille,
 qui par trop dans la France brille;
 Le comparant au charpentier,
 qui prenant dedans son chantier
 Bois pour soustenir vne vouste,
 Tout aussi-tost qu'elle est absoute,
 Et que pierres tiennent si bien
 que besoin n'ont plus de soustien,
 Et que point n'en viendra de faute
 Lors que charpentier le bois oste,
 Et n'en fait plus estat aucun
 Pour peu le donnant à quelqu'un:
 Ainsi l'oncle de la Duchesse
 Craignant que faueur piperesse
 Ne luy donnast du pied au cu,
 Si bien que d'honneurs fut descheu,
 Cette recherche a pratiquée
 Et si l'a si bien fabriquée
 qu'enfin à bout en est venu,
 Et que mariage faict fut.
 Il en eut grande soustenance,
 Car tout chacun a connoissance,
 qu'en branle dans Narbonne estant,
 Son bagage alloit aprestant,
 Pour fuir vne faueur naissante,
 Et de vitesse diligente
 Dans Auignon se retirer,
 Et ses ioyaux y transferer.
 Alors ce Prince magnanime
 Dont on doit faire grande estime,
 Contre la crainte l'assura,
 Et support sien se declara.

Dont le Cardinal prit courage,
 Et en fit esclater sa rage,
 Contre deux pauvres mal-heureux,
 A qui ce cœur point genereux,
 A Lyon fit couper les testes,
 Qu'il creut arrester ses conquestes,
 Si bien que le mal-heureux sort,
 Qui les conduisit à la mort,
 Fait que l'on plaint leur infortune,
 Laquelle ne fut point commune:
 Car si lors l'eussent éuité,
 Fuyant deuant la cruauté,
 De cet homme plein de vengeance,
 Et de pardon n'ayant science,
 Leurs testes sur leurs cols seroient,
 Et leurs carrosses trotteroient,
 Comme ceux de maintes personnes,
 qu'on n'a point estimé poltronnes,
 D'auoir éuité sa fureur,
 Dont tout le monde auoit horreur,
 Finissans leur pelerinage,
 Si tost qu'il eut plié bagage,
 Et que sur Pont-Neuf eut passé,
 Comme la bien Rondeau pensé,
 Mais comme il fut en assurance,
 Du Prince il n'eut plus souciance,
 Et mesme la desherité,
 Ce qui procez a suscité;

Puis dit que bruit de populace,
 Ne doit auoir telle efficace,
 Qu'il puisse se persuader,
 De confiscation demander,
 De l'innumerable cheuance,
 Dont il auoit grande abondance,
 Ce qu'on ne peut sans que procez,
 Soit fait au corps pourry d'abcez,

Et que memoire soit damnée,
 De l'Eminence condamnée,
 En apres prit conclusion,
 Disant, n'y auoir lesion,
 Et que clause estoit authentique,
 Faite en forme fort iuridique,
 Par laquelle dans le contract,
 Par homme fait n'estant grand fat,
 La Princesse auoit à l'hoirie,
 Renoncé quoy que l'on en die,
 Puis demanda commission,
 Et d'auoir la permission,
 Pour exacte recherche faire,
 Des deniers que par là misere,
 Des peuples, deffunct Cardinal,
 Soit sous le tiltre d'Admiral,
 Ou bien sous quelque pretexte autre,
 Auoit pris du mien & du vostre,
 Et qu'à l'Estat l'argent seruit,
 Qu'à luy autresfois il rait ;
 Ainsi dans l'Espargne Royale,
 Que l'on mette somme totale.
 Quand tout dit il eut, il se ceut,
 Et ie croy que d'un Substitut,
 Luy fut fort bien venu l'vsage,
 Pour vn peu frotter son visage,
 Car ayant parlé long-temps hault,
 Il ne pouuoit que moult n'eust chault;
 Adonc il se sied & s'essuie,
 Et pendant que le monde bruie.
 Monsieur le Premier President,
 Opinions va demandant,
 A tous les Messieurs de l'Eglise,
 Portans au menton barbe grise,
 Puis à Messieurs Conseillers Lais,
 Anciens Iusticiers du Palais,

Cependant

Cependant l'on dit sa sentence,
 Et vn chacun ce qu'il en pense,
 Si vn dit, que Monsieur Briquet,
 Parlé n'a point en Perroquet,
 Qu'il a conduit son eloquence,
 Auecque grande suffisance;
 Autres sont estonnez comment,
 Conclud il n'auoit autrement;
 Autres disent, que son langage,
 S'est monstré remply de courage,
 Et que dignement a requis,
 L'argent que l'on auoit mal pris.
 Vn autre esprit bien plus critique,
 Dir, que c'est la cause publique,
 Et que l'Aduocat General,
 Auec son discours Do&oral,
 A parlé comme vn sçauant homme,
 Et qu'il a fort bien fait en somme,
 Mais que non seulement l'argent,
 Pris sur riche, & sur indigent,
 Ains aussi terres, & domaine,
 Dont sa succession est pleine,
 Deuoit pour le Roy requerir,
 Pour ce grand Estat secourir.
 Cependant pour cesser tumulte,
 Huissier de sa baguette insulte,
 Sur les non parlans & parlans,
 Et les plaidoyers controollans.
 Il crie qu'on fasse silence,
 Afin d'auoir intelligence,
 De ce que portera l'Arrest,
 Où plusieurs prennent interest.
 Monsieur Molé reprend sa place,
 Et prononce de bonne grace,
 Auis ayant pris tour à tour;
 Sur l'appel au Conseil, la Cour,

A les parties appointées,
Et tant sur lettres présentées,
Que sur les interuentions,
En droict avecque jonctions,

Alors Gaultier leuant la creste,
A fait iudiciaire requeste,
Et le sequestre a demandé,
Tant que le procez soit vuidé.
Mais la requeste l'on appointe,
Et comme le reste elle est jointe.

Là dessus se leue la Cour,
Et laisse le doré sejour,
De cette Chambre lambriffée,
Où Iustice est bien dispensée,
Après la foule s'en alla,
Et tout le peuple s'escoula :

Le croy que toutes les parties,
Après qu'elles furent sorties,
Tant demandeurs, que, **defendeurs**,
Remercier furent Messieurs,
Car tout hault la noble Duchesse,
Que disposition expresse,
A colloqué vtilement,
Dedans ce fameux testament,
Ne sçait que par trop bien son monde,
Et de trop de sagesse abonde,
Pour s'oublier de son deuoir,
A quoy ne la faut esmouuoir,

Quand à moy, faut que ie te die,
Que pendant cette tragedie,
Chaleur m'auoit tant alteré,
Que ma foy ie fusse expiré,
Si i'eusse esté long temps sans boire,
(Aussi n'eus-je escrit cette Histoire,)
Je te diray donc nettement,
Que ie m'en allay joliment,

Dedans Palatine Beuette,
Où j'aualay ma chopinette,
Et mangeay de beuf vn morceau
Auecqu'vn ieune iouuenceau.

De la cause voila la suite,
que si bien ie ne l'ay deduite
C'est que comprise ie l'ay mal.
Mais comme tu es bien legal,
Excuse moy ie t'en supplie,
Sinon ne m'en fascheray mie;
Si pourtant ne m'excuse pas
Ce sera pour moy piteux cas,
D'autant qu'en matiere de carmes
Tu rire beaucoup mieux qu'aux armes:
Toutefois m'en consoleraay,
Et plus qu'en prose n'escriray.

Ie finis faisant ma priere,
que j'adresse à Monsieur ton Pere,
(Ce que faire tres-bien ie peux,
Car maintenant est bien-heureux,
Puis que l'Eminente malice
L'a fait souffrir pour la Iustice,)
que par son intercession
Bien-tost ayes la fonction
Des membres en parfait vsage:
Ce qu'acause du parentage
Pour toy pourra bien impetrer
Si sa puissance il veut monstrier :

Crois moy donc, avec reuerence
Tu dois chercher son assistance,
Afin qu'ayes par son secours
Soulas le reste de tes iours.
C'est le conseil que ie te donne,
Non qu'absolument te l'ordonne;
Mais s'il te plaist en vseras,
S'il ne te plaist le laisseras.

F I N.

LA Cour a permis à la Veuve Theodore Pepingué,
& Estienne Maucroy, d'imprimer, vendre & debiter
le Liure intitulé *Procez Burlesque entre Monsieur le Prince &
Madame la Duchesse d'Esguillon*, & deffences à tous autres
de l'imprimer. Fait le 25. Mars. 1649.

